



PRIMA SESSIONE STRASURDINARIA DI U 2022
27 È 28 DI GHJENNAGHJU DI U 2022
1ERE SESSION EXTRAORDINAIRE DE 2022
27 ET 28 JANVIER 2022

N° 2022/E1/006

**Quistione à bocca posta da Romain Colonna
à nome di « Fà Populu Inseme »**

UGHJETTU : Patrimoniu di a Cullettività di Corsica è nomi di e sale.

O Sgiò presidente di u Cunsigliu esecutivu di Corsica,

Si sà chì dà un nome à un affare o à un locu, hè un pruceddu antropologicu è simbolicu di primura alta. Hè una manera pà l'Omi d'impatrunisce si di quellu ogettu o di quellu locu è à tempu ghjè una manera di fà lu esiste, di dà li una rialità. Participaghja ancu à a catigurizazione è l'organizzazione di u mondu suciale.

Quand'è no semu ghjunti à e rispunsabilità tarritoriale in lu 2015, avemu pussutu apprizzà cullettivamente una gistione nova di parechji simboli impurtanti da marcà u spaziu isulanu puliticu è a nostra storia stituziunale. Si pò pinsà, par un dettu, à u primu viaghju ufficiale di u novu esecutivu di Corsica in Sardegna chì aldilà di l'intaressi culturali o economichi, avia quellu viaghju una diminsione simbolica impurtante. Si pò ammintà dinò a stallazione di un bustu raprisintendu à Maria Gentile, spostu à l'intrata d'onore di u Gran'palazzu di a Cullettività di Corsica. Ci si stà quellu bustu à cantu à a scultura di Napulione è à pettu à quellu di Pasquale Paoli. Ci parmette di ramintà ci di a nostra storia è a so cumplessità.

In issu spiritu quì, avia postu una muzione di maghju di u 2018 in quantu à i nomi di e principale sale di u pianu di tarra di u palazzu aiaccinu di a Cullettività. Aldilà di a simbolica, puru s'è à le volte vene impurtante in pulitica, ci paria utule di trapassà a neutralità di i nomi dati sinu à avà : sala 1, sala 2, sala 3 ecc di u principale bastimentu di a Cullettività...

Aviamu cuscenza di u carattaru simbolicu di quella operazione chì vene in cumplimentu di una azione publica più larga. Ma puru, quella muzione, avia parmessu, à traversu u so trattamentu in cunfarenza di i Prisidenti, di mette ci in discussione, aldilà di e nostre appartenenze pulitiche. Tandù ogni gruppu di l'Assemblea avia fattu pruposte, po ci eranu state discussione chì ci avianu parmessu d'esse cullettivamente d'accunsentu nantu à unipochi di nomi da rende umagi varii è da strutturà u nostru spaziu stituziunale. Cusì, era statu prisintatu un raportu di l'Assemblea di Corsica à a sissione di farraghju di u 2020 è era stata appruvata à l'unanimità¹ una prima lista di nomi : « Sala Danielle CASANOVA » pà u salottu verde, « Sala Edmond SIMEONI » pà a sala prestigiosa numeru 2, a sala 5 avia da duvintà « Sala Michel ROCARD », a sala 4 battizata « Sala Marie-Josée NAT ». Quella sala di e cummissione di u Palazzu Lantivy, a maiò chì tocca l'emiciculu, avia da esse numinata « Sala Marie Susini » è infine una sala di a cusì detta « Coupole » in Bastia, avia da esse battizata di u nome di una di e vittime di l'esecuzione di u Niolu in lu 1774 « Sala Marcu Maria ALBERTINI ».

Ci avia parmessu dinò issa andatura d'avè una riflissione più larga nantu à l'inseme di u patrimoni custruitu di a Cullettività di Corsica, centinai di bastimenti è sale. Ci eranu avvisti par un dettu chì certi nomi pudianu pone prublemi.

Ghjustu dopu à quellu raportu, hè affaccata a crisi sanitaria liata à u Covid chì ci hà impeditu di battizà ufficialmente tutte isse sale à traversu una cerimonia publica di qualità. Sola quella lastra di Marcu Maria ALBERTINI hè stata posta in Bastia da l'anzianu presidente di l'Assemblea pricisendu chì passata a crisi una cerimonia dedicata avia da esse urganizata.

Averete capitu a me dumanda : a crisi dura è tandu vurriamu sapè quand'ellu saria pussibile d'andà à fine di a prucidura pà e sale di quellu palazzu di a Cullettività è s'ella era pussibile di rilancià a riflissione nantu à l'inseme di u patrimoni custruitu ch'ella pussede a Cullettività.

À ringrazià vi pà a vostra risposta !

¹ Deliberazione N° 20/016 AC.